

ORDNING FOR HØGMESSE MED DÅP

Vangskyrkja på Voss

I. samling

1 | Førebuing

Kyrkjerommet skal vere ope ei stund før gudstenesta, med høve til å sitja i stille, i ettertanke og bøn.

Klokkeringing Tre klokkeslag

2 | Inngangssalme

I fall det er prosesjon går den inn under preludiet/forspelet eller inngangssalmen, leia av krossberar.

3 | Inngangsord

Liturg avgjer kva for inngangsord ein skal bruka. Alternativet her er vanlegast:

Kjære kyrkjelyd. L | Må vår Herre Jesu Kristi nåde, Guds kjærleik og Den heilage Andes samfunn vera med dykk alle.

4 | Samlingsbøn

Dagens bøn kan nyttast som samlingsbøn, fyrst og fremst på høgtidsdagar. Liturgen kan velga ei anna samlingsbøn, avhengig av kva søndagen handlar om.

Samlingsbøna vert innleia med:

L | Lat oss be.

Til vanleg vert denne samlingsbøna brukt. 7

Denne bøna høver særleg godt i gudstenester med mange born. Ei gruppe born kan stå framfor kyrkjelyden og visa teikna. Dei i kyrkjelyden som ønskjer det, kan gjera handrørslene saman med borna.

Lyfte hender

ML/L | Kjære Gud, du er hos oss. Tenn ditt lys i oss.

Hendene i kryss framfor brystet

ML/L | Kjære Jesus, du går med oss. Lat oss få leva i din fred. ML | **Tilgjev oss Gud.**

Hendene mot kvarandre framfor brystet med fingertuppene opp.

ML/L | Kjære Gud, du ser oss. Ta imot våre tankar og stille bøner.

Hendene strekte ut framfor brystet med handflatene opp

ML/L | Kjære Jesus, du tek våre hender i dine. Lei oss på din gode veg.

Vi held dei som sit ved sida av oss, i handa

ML/L | Gode heilage Ande, takk for at vi ikkje er åleine. Hjelp oss å sjå kvarandre med kjærleik.

6 | Bønerop kyrie

Kyrie vert sunge.

A | Kyrie eleison, Gud Fader, miskunna deg.

Kriste eleison, Herre Krist, miskunna deg.

Kyrie eleison, Heilag Ande, miskunna deg.

7 | Lovsang gloria

Gloria vert sunge.

L | Ære vere Gud i det høgste

M | og fred på jorda blant menneske som Gud har glede i.

Vi lovar deg, vi prisar deg, vi tilbed deg, vi opphøgjer deg. Amen.

Utvida lovsong brukast på høgtidsgudstenester. *Se side 2.41.*

Dåpssalme

Kyrkjelyden står under dåpssalma og dåpsfylgjet kjem inn i kyrkjerommet i prosesjon, før dei går til sine reserverte plassar.

1 Mottaking til dåp

L | I namnet åt Faderen og Sonen og Den heilage ande.

Med takk og glede kjem vi i dag med *dette barnet/desse borna* til Gud i den heilage dåpen. I dåpen tek Gud imot oss og sameinar oss med den krossfeste og oppstadne Jesus Kristus. Høyr kor venleg Jesus tek imot borna og opnar Guds rike for dei:

ML/L | Dei bar småborn til Jesus for at han skulle røra ved dei, men læresveinane viste dei bort. Då Jesus såg det, vart han sint og sa til dei: «Lat småborna koma til meg og hindra dei ikkje! For Guds rike høyrer slike til. Sanneleg, eg seier dykk: Den som ikkje tek imot Guds rike slik som eit lite barn, skal ikkje koma inn i det.» Så tok han dei inn til seg, la hendene på dei og velsigna dei.

Mark 10,13–16

L | Lat oss takka og be:

Evige Gud, du som gjev liv til alt som lever og har skapt oss i ditt bilete: Vi takkar deg for *NN/NN* som i dag skal bli *døyp/døypte*. *Ho/Han/Dei* er dyrebar(e) i dine auge. Ver hos *henne/han/dei* med din kjærleik og gje *henne/han/dei* ein heim i di kyrkje. Amen.

3 Dåpsbefalinga

L | Lat oss høyra Jesu ord og bod om den heilage dåpen:

ML/L | Eg har fått all makt i himmelen og på jorda. Gå difor og gjer alle folkeslag til læresveinar: Døyp dei til namnet åt Faderen og Sonen og Den heilage ande og lær dei å halda alt det som eg har bode dykk. Og sjå, eg er med dykk alle dagar så lenge verda står.

Matt 28,18–20

4 Fadderansvaret

L | Vil foreldre og fadrar reisa seg.

De skal vera vitne om at *barnet/borna* er *døyp/døypte* med den kristne dåpen.

Saman med kyrkjelyden vår og heile kyrkja får de del i eit heilagt ansvar:

- å visa omsorg for *henne/han/dei*,
- be for *henne/han/dei*,
- læra *henne sjølv/han sjølv/dei sjølve* å be
- og hjelpa *henne/han/dei* til å bruka Guds ord
- og delta i den heilage nattverden,

så *ho/han/dei* kan leva og veksa i den kristne trua.

5 Forsakinga og trua

L | Lat oss saman vedkjennast forsakinga og trua, som vi blir døypte til.

Alle reiser seg.

A | **Eg forsakar djevelen og alle hans gjerningar og alt hans vesen.**

**Eg trur på Gud Fader, den allmektige,
som skapte himmel og jord.**

**Eg trur på Jesus Kristus,
Guds einborne Son, vår Herre,
som vart avla ved Den heilage ande,
fødd av Maria møy,
pint under Pontius Pilatus, vart krossfest, døydde og vart gravlagd, fór ned
til dødsriket,
stod opp frå dei døde tredje dagen,
fór opp til himmelen, sit ved høgre handa åt Gud, den allmektige Fader,
skal koma att derifrå og døma levande og døde.**

Eg trur på Den heilage ande, ei heilag allmenn kyrkje, eit samfunn av dei heilage, forlating for syndene, oppstoda av lekamen og evig liv. Amen.

Den apostoliske truvedkjenninga

6 Dåpshandlinga

Ein heller vatnet i døypefonten.

L | Miskunnsame Gud, vi takkar deg for at dåpsvatnet ved ditt ord er ei nådens kjelde, der du tilgjev oss vår synd, frelsar oss frå dødens makt og gjev oss lovnad om det evige livet. Send din Ande, så *ho/han/dei* som blir *døypt/døypte*, blir *reist/reiste* opp til det nye livet med Jesus Kristus, vår Herre.

Dåpsfølgjet går fram til døypefonten.

L | Kva heiter barnet?

Den som ber barnet, seier fornarnet på barnet.

L | Vil de at *NN* skal døypast til namnet åt Faderen og Sonen og Den heilage ande og oppsedast til eit liv i den kristne forsakinga og trua?

Den som ber barnet, foreldra /dei føresette og fadrane svarar: Ja.

L | Gud vare din inngang og din utgang frå no og til evig tid. Eg teiknar deg med det heilage krossmerket ✠ til eit vitnemål om at du skal høyra den krossfeste og oppstadne Jesus Kristus til.

L | *NN*, etter vår Herre Jesu Kristi ord og bod døyper eg deg til namnet åt Faderen og Sonen og Den heilage ande.

L | Den allmechtige Gud har no gjeve deg sin heilage Ande, fødd deg på nytt og teke deg inn i sin truande kyrkjelyd. Gud styrkje deg med sin nåde til det evige livet. Fred vere med deg.

Ein seier følgjande ord:

L | Dette er *NN* (fornamn), Guds barn, døypt inn i vår kyrkjelyd og Kristi verdsvide kyrkje.

Etter kvar dåp og presentasjon kan ein tenna eit lys. Liturgen kan seia:

L | Eit lys er tend for *NN*.

Når alle dåpslysa er tende, seier liturgen:

L | Jesus seier: «Eg er lyset i verda. Den som følgjer meg, skal ikkje vandra i mørkret, men ha livsens lys.»

Joh 8,12

Fadervår blir sagt fram.

L | Lat oss saman be den bønna Jesus har lært oss:

A | **Vår Far i himmelen.**

Lat namnet ditt helgast.

Lat riket ditt koma.

Lat viljen din råda på jorda slik som i himmelen.

**Gjev oss i dag vårt daglege brød,
og tilgjev oss vår skuld,**

slik vi òg tilgjev våre skuldnarar.

**Og lat oss ikkje koma i freisting,
men frels oss frå det vonde.**

Før riket er ditt og makta og æra i all æve.

Amen.

L | Lova vere Gud, vår Herre Jesu Kristi Far, han som i si store miskunn har fødd oss på nytt til ei levande von ved Jesu Kristi oppstode frå dei døde.

1 Pet 1,3

| Salme etter dåpen

II. ordet

Kyrkjelyden står under evangelielesinga og sit under dei andre lesingane.

8 | Første lesinga

Liturgien vel kva for av lesetekstane som skal lesast.

L/ML | Lat oss høyra Herrens ord.

ML | Det står skrive hjå/i ...

Lesinga vert avslutta med:

ML | Slik lyder Herrens ord.

9 | Salme

Det kan syngast ein bibelsk salme eller ein annan salme.

11 | Evangelium

L/ML | Det står skrive i evangeliet etter ...

Lesinga vert avslutta med med:

L/ML | Slik lyder det heilage evangeliet.

12 | Preike

Preika kan avsluttast med lovprisinga:

Ære vere Faderen og Sonen og Den heilage ande, som var og er og vera skal ein sann Gud frå æva og til æva.

14 | Salme

III. forbøn

15 | Kunngjeringar

Det fulle namnet på dåpsborna vert lese opp under kunngjeringane.

Kunngjeringene kan avsluttast med at kyrkjelyden reiser seg og minnst dei frå kyrkjelyden som er gravlagde sidan sist kyrkjelyden var samla.

ML | Vi reiser oss og minnst dei i kyrkjelyden vår som det er halde gravferd for sidan sist vi var samla.

Namna vert lesne opp.

Herre, ver nær hjå dei som har mista ein av sine kjære. Lær os å telja våre dagar, så vi kan få visdom i hjartet. Salme 90,12

5 | Syndsvedkjenning

Synsvedkjenninga vert innleia med:

L | Lat oss bøya oss for Gud og be om tilgjeving.

Til vanleg brukar ein denne synsvedkjenninga:

A|: Gud, ver meg nådig!

Eg har synda mot deg og svikta min neste - med tankar og ord,
med det eg har gjort

og med det eg har forsømt.

Tilgjev meg mi synd for Jesu Kristi skuld.

Skap i meg eit reint hjarte,

og gjev meg kraft til nytt liv ved din heilage Ande.

Andre synsvedkjenningar, se side 2.35–2.38.

Lovnadsord

L | Så høg som himmelen er over jorda, så veldig er Herrens miskunn over dei som fryktar han. Så langt som aust er frå vest, tek han syndene våre bort frå

OSS. Salme 103,11-12

16 | Forbøn for kyrkja og verda

Vi har utforma lokal forbøn som normalt brukast i høgmessa. Litaniet vert sunge i fastetida. Ein nyttar fredslitaniet 17.mai.

Denne bønna lesast under forbøna, saman med lokalt uforma forbøn.

L | Lat oss takka og be.

ML/L | Trufaste Gud, vi takkar deg for dåpen,
der du tek imot oss og kallar oss med namn.

Vi bed for NN/borna/dei som er døypt/døypte i dag. Ver med henne/han/dei
gjennom livet

og vara henne/han/dei i dåpens nåde.

Styrk foreldra og fadrane i oppgåva dei har fått.

Gud, høyr vår bøn.

Vanleg kyrkjelydssvar vert sunge mellom kvart ledd:

Herre høyr vår bøn.

Ved siste ledd syng ein også: **Amen.**

17 | Takkoffer frå kyrkjelyden

Normalt rundt alteret. Under innsamlinga kan det vera korsong, solosong eller annan høveleg instrumental musikk eller kan ein syngja éin eller fleire salmar.

Ofringa vert avslutta med ei kort bøn:

L | Evige Gud, di er jorda og det som fyller henne. Alt vi eig høyrer deg til.

Av ditt eige gjev vi deg attende. Ta imot oss og gåvene våre i Jesu namn.

Amen.

V. Sending

22 | Salme

Kyrkjelyden står under siste salma.

23 | Velsigning

Lovprisning benedicamus

Normalt:

L syng | Lat oss prisa Herren.

M | **Gud vere lova. Halleluja. Halleluja. Halleluja.**

Velsigning

L seier eller syng | Herren velsigne deg og vare deg.
Herren late sitt andlet lysa over deg og vere deg nådig.
Herren lyfte sitt åsyn på deg og gje deg fred.

A | **Amen. Amen. Amen.**

Tre gonger tre bøneslag

25 | Postludium

26 | Utsending

L | Lat oss gå i fred.

A | og tene Herren med glede.